

## Kes pecah amanah Yayasan Akalbudi

# Zahid keluar RM9.3 juta selepas PRU-14: Saksi

**Wang Yayasan Akalbudi dipindahkan ke akaun Yayasan Al-Falah milik adik bekas TPM**

**Kuala Lumpur:** Mahkamah Tinggi di sini, semalam diberitahu bahawa Datuk Seri Dr Ahmad Zahid Hamidi mengeluarkan wang RM9,302,832.66 dari pada akaun Yayasan Akalbudi milik bekas Timbalan Perdana Menteri itu selepas Pilihan Raya Umum Ke-14 (PRU-14).

Saksi pendakwaan terakhir yang juga Pegawai Penyiasat Suruhanjaya Pencegahan Rasuah Malaysia (SPRM), Khairudin Kilau, 44, berkata menerusi hasil siasatannya, wang itu yang dikeluarkan pada 28 Mei 2018 dipindahkan ke akaun Yayasan Al-Falah milik adik Ahmad Zahid, Datuk Seri Mohamad Nasaee Ahmad Tarmizi.

“Pemindahan wang berkenaan terletak pada kuasa tertuduh (Ahmad Zahid) kerana beliau penandatangan tunggal dalam Yayasan

Akalbudi,” jawabnya ketika ditanya Timbalan Pendakwa Raya, Lee Keng Fatt ketika pemeriksaan utama mengenai pengeluaran wang itu.

Saksi pendakwaan ke-99 itu berkata demikian pada hari ke-52 perbicaraan Ahmad Zahid yang menghadapi pertuduhan rasuah, pecah amanah dan pengubahan wang haram membabitkan jutaan ringgit daripada dana Yayasan Akalbudi.

Ditanya Keng Fatt mengenai tujuan pemindahan wang itu, Khairudin menjawab: “Saya tidak berapa jelas. Minit mesyuarat atau resolusi mengenai pemindahan wang itu juga tidak ditemui.”

Mengenai transaksi keluar masuk wang Yayasan Akalbudi dalam tempoh 12 Disember 2012 hingga 31 Mei 2018, saksi berkenaan berkata, berdasarkan pernyata akaun Affin Bank Berhad milik Yayasan Akalbudi, terdapat keluar masuk wang lebih kurang RM100 juta.

Ketika membacakan pernyataan saksinya, Khairudin berkata, RM360,000 wang Yayasan Akalbudi dikeluarkan untuk dibayar kepada TS Consultancy & Resources bagi menjalankan soal selidik dan kajian pengundi pilihan raya.

“Berdasarkan dokumen dan maklumat saksi, isu bayaran kepada TS Consultancy & Resources menunjukkan ia digunakan untuk menjalankan soal selidik dan kajian pengundi.

“Pemilik syarikat iaitu Jasni Majid dan Sabri Said mengesahkan syarikat TS Consultancy ditubuh pada 2015 bagi program pendaftaran pengundi di lapanan dengan kerjasama parti UMNO dan pada awal penubuhan menerima dana daripada pejabat parti UMNO,” katanya.

Mengenai penubuhan Yayasan Akalbudi, saksi itu berkata, pejabat yayasan itu tidak pernah beroperasi di alamat yang didaftarkan dengan Suruhanjaya Syarikat Malaysia (SSM).

Berdasarkan notis pendaftaran SSM, yayasan itu didaftarkan di alamat 69E-4, Jalan Raja Abdullah di sini.

Khairudin berkata, hasil pemerkasaannya di alamat itu bagi mendapatkan laporan tahunan, laporan audit serta minit mesyuarat Yayasan Akalbudi, mendapati yayasan itu tidak beroperasi di alamat berkenaan.

“Dokumen berkenaan tidak ditemui kerana alamat yang didaftarkan dengan SSM, tiada pejabat Yayasan Akalbudi beroperasi di situ,” katanya dan memberitahu

bahawa Yayasan Akalbudi tidak pernah menyerahkan dokumen itu kepada SSM.

Ditanya Keng Fatt jika saksi ada bertanya kepada Setiausaha Yayasan Akalbudi, Mahinder Kaur Teja Singh mengenai dokumen itu, Khairudin menjawab: “Beliau (Mahinder) kata tak simpan dokumen berkenaan, tidak pernah mengadakan mesyuarat serta tidak menyediakan laporan audit yayasan itu.

“Beliau (Mahinder) memberitahu bahawa tiada arahan daripada pengurusan Yayasan Akalbudi untuk membuat mesyuarat atau menyediakan laporan audit.”

Khairudin berkata, siasatannya mendapati Tetuan Lewis & Co bukan pemegang amanah atau peguam kepada Yayasan Akalbudi seperti yang dicadangkan pihak pembelaan sepanjang perbicaraan kes itu.

“Pelanggan Lewis & Co ialah Yayasan Al-Falah dan Ahmad Zahid sendiri. Lewis & Co menguruskan bagi kes-kes sivil Ahmad Zahid,” katanya dan menambah bahawa tiada hubungan rasmi di antara Yayasan Akalbudi dan Yayasan Al-Falah.

Khairudin adalah pegawai penyiasat SPRM ke-10 dipanggil pihak pendakwaan. BERNAMA